

## Sche la chasa quintass – in pastizier passiunà

■ **Chasa gl'Uors Nair, citad da Cuira. Qua sa chattava la pastizaria dad Otto Hürsch. 1899 ha Otto Hürsch pudì cumprar questa chasa statale amez la citad veglia en la giassa sutò. Oz sa chatta gist dasperas l'enconuschenta Werkstatt, il lavuratori cultural da Cuira. Ma tgi era quest Otto Hürsch?** Dus onns avant, 1887, ha el creà ils renumads craps-persic da Cuira, ils quals vegnan anc oz producids en stretga vischinanza entras il pastizier jauer *Arthur Bühler*, possessur da la pastizaria sper la Porta sura. Sch'ins sa cun tgi ch'ins po discurrer è Cuira quasi ina citad rumantscha. Ma ils Hürschs na discurrivan betg rumantsch, el era vegnì si da la Bassa.

Otto Hürsch era figl da Jakob Heinrich Hürsch, reformà e fravi d'arom. El ha gia baud surprindì la fravgia da ses bab a Zofingen. La fravgia ha survegnì la gronda incumbensa da producir tut las chalderas d'atschal per modernisar tut las navs a vapor dal Lai da Constanza. Per accumplir quai ha Jakob Heinrich Hürsch prendì alloschi ad Arbon en in hotel situà sper il lai. Là ha el inscuntrà Dorothea Studer da Roggwil, la figlia dal hotelier, la quala el ha maridà 1841. Tut pareva bun, ma ses bab è daventà dependent da l'alcohol ed ins ha stui vender la fravgia. Otto Hürsch è naschì 1860 sco penultim uffant da 14 fragliuns ed è gia da pop vegnì tar in'otra famiglia. Ils emprims onns ha el passentà tar in'amia da sia mamma insanua en l'Argovia, pli tard anc tar in pèr, in scolast ed ina scolasta. 1872 è sia mamma morta,

avant ch'el ha pudì turnar a chasa. Otto Hürsch ha stui absolver in emprendissadi sco telegrafist tar la Posta perquai che quai era in mastergn cun futur. En quels onns ha el giudi ina stretga relaziun tar la famiglia da ses frar, 19 onns pli vegl, Johann Heinrich Hürsch. Per pudair nutrìr sia famiglia è ses frar stà diesch onns lavurer tar la South Pacific Railways a California. Ina figlia da quest frar, Carolina Tschuor-Hürsch, è pli tard stada camariera tar ses aug Otto a Cuira.

Suenter avair absolvì l'examen final tar la Posta ha el tschertgà in'emprendissadi sco conditer. Otto Hürsch ha chattà ina piazza tar la conditoria Rieder a Cuira ed ha perquai bandunà ses confamiliars ed il chantun patern. Suenter trais rigurus onns da giarsunadi ha el dumagnà la maestria ed ha uschia pudì fundar ina atgna

conditoria. Quai ha el era fatg a Cuira en la Reichsgasse 57. Da quest temp era quai dentant be pussaivel suenter maridar. Uschia ch'el ha maridà Ida Müller, ina camerata da sia sora, l'onn 1887. La fatschenta marschava, era sche alcohol era tabu en sia pastizaria. Quai mussa ch'el aveva talent ed inschign. Magari era lavurers da la viafier che vegnivan a café e cussegliavan probabel era sia pastizaria a viandants. Gia 1888 ha el cumprà la conditoria da ses anteriur patrun e 1899 la chasa gl'Uors Nair. Il pèr ha tegnì sis uffants. Il figl vegl, Otto Hürsch, ha 1922 surprindì la conditoria dal bab che ha tegnì blers abiadis ed è mort 1947 a Cuira en l'auta vegliadetgna dad 87 onns.

Malgrà il success n'ha Otto Hürsch mai emblidà sia uffanza. Otto Hürsch è s'engaschà per emprendists che avevan basegn d'in sustegn. 40 onns è el stà activ tar l'Associazion grischuna per emprendists da la mastergnanza ed ha cuntanschì che juvenils povers han pudì giudair ina solida educaziun professiunala. Prest tuttina ditg è el stà en supranza da la Associazion grischuna-evangelica per orfans. Da questa organisaziun è el stà confundatur. El è medemamain sa participà tar la fundaziun da l'Uniun grischuna d'artisanadi e mastergn ils onns 1900/01 ed ha timunà quest'uniun. 1908 è vegnì indrizzà in secretari permanent a Cuira sin sia iniziativa. El è vegnì retschet sco commember d'onur da quest'uniun e schizunt era da l'Uniun svizra d'artisanadi e mastergn.

*Wolf Candrian*

